


駐藏程棧



駐藏程棧

成都府至雅州府共三百六十里



二月三十日自成都起程出南門外過寫橋亦名萬里橋橋下錦江水由灌口過溫江而流來又名流江也又二里武侯祠今值駐藏大臣赴藏起程本城文武官員均在祠送行拜別又一里至紅牌樓係地名路旁竹叢甚多又四里至三洞南橋橋下水亦係灌口流江之水分支也沿路松竹又八里至五洞箬橋橋下水亦流江之分流也橋之南北有鋪戶係雙流縣交界又十里至金花橋塘過五洞金花橋昔有一女至此河下濯水時人驚覺之其女袖中落金花片地而去故名金花橋又十里至雙流縣城進東門公館宿站共行程四十里自成都一路平坦路旁左右皆水田稻米芋薺陸田麥子菀豆胡豆油菜苜蓿倭笋等菜沿路小橋不可勝計

三月初一日自雙流縣城出南門門旁有商瞿故里

石碣建立又二里至寶塔灣有四方楞寶塔高十八丈塔門向北因有風鑑人者建修此塔正對南門為縣城南門屏壁又三里至逍遙堂舊跡立有石碣乃唐之令官韋嗣立故里又五里至南林鋪塘又十里過黃水河三洞大石橋橋下水由灌口過溫江縣南流四十里又過新津縣東流至彭山縣合岷江橋之東西有鋪戶又九里至花園場塘又一里至串頭鋪有鋪戶係新津縣交界又十里至花橋子係地名有

各行鋪戶自花橋子塘行四里至新津河東岸若水漲時河面三里餘寬倘水微消時河中露出石子沙灘相隔此一道新津河以舟渡三道倘河水大消時以舟為浮橋或涉水上西岸至新津縣城東門三里進東門公館宿站共行程五十里俗謂走盡天下路難過新津渡作此二句者是遇河水漲溢過此渡耳此河實係水漲則險水消則平新津河源發岷山出灌口而過溫江乃岷江右支分流之水也新津城乃

古蠶叢地西河即岷江之分流也自雙流縣一路平坦路旁左右松竹水陸田疇小橋頗多

初二日自新津縣城出西門沿江北岸西行順大路路南竹樹路北民房五里至太平橋橋上長廊與橋同橋下水係斜江河下注東流分支之水也橋之南北有舖戶地方繁華呼之為太平場街又五里至鐵溪橋塘先過東西三洞石橋由路轉向南行相距二十步又過南北三洞石橋橋下乃鐵溪河源出蓮

花山東北過百丈縣故城為百丈水又東過臨溪縣故城南又東入蒲江昔武侯烹鐵於此又十里至邛州界牌橋又十里至楊家場街之南北有舖戶店房街之西口外即斜江河也視此河寬一里許遇水漲則險暫不可過若水消搭造浮橋以通往來浮橋約二三十步長其斜江河原有十二洞舊石橋因年久廢圮由橋之西被水衝為河身石橋反置陸地考此河源出大邑縣鶴鳴山東委曲斜流故名斜江河係

邛州境過河在路南公館尖站共行程三十里
自斜江河行十里至天水橋再十里至高橋堡塘係
三洞石橋又十里至聖化堡係嚴君平故里原有石
碣因年深壞碎無考聖化堡西相距一里許其地有
嚴君平橋在馬過橋又三里許至火燒橋有鋪戶又
十里至天官橋又五里至御虹橋再五里至邛州城
進東門書院宿站共行程五十五里自天水橋至御
虹橋以上五橋下水皆邛水東流分支下注之水也

此州漢臨邛地城內有楊家父子天官石牌坊又有
司馬相如捧琴台讀書亭係遇卓文君處城南街有
文君井邛州西門外有鶴鳴寺幽居寺內有讀書台
洗墨池其中亭臺樓榭魚池至極壯麗乃昔名儒魏
了翁先生講學隱居處自新津縣一路平坦路旁左
右仍松竹田疇至邛州過此則路漸崎嶇

初三日自邛州城出南門一里半過邛水大石橋橋
下係臨邛水有三源北源出圓覺山西源出牛心山

南源出伏牛山合流而東古名濮千水又名布濮水亦名白木水俗曰邛水東北過火井縣故城南又東受鄰水又東過邛州城南為南河又東過蒲江水又東受牙江又東受斜江又東合文井江又東過新津縣南又東過寶華山下入汶江也橋之兩端有牌樓橋上中間建立高閣橋長一里許共十五洞橋之東立石牌對橋面曰川南第一橋係道光十二年十二月立邛州牧宣瑛勸捐修造八載費金數萬橋始成

過橋即大通街乃阜和協屬黎雅營塘汎土地埵地方上小坡又八里半許至十里橋

碣曰永濟橋

俗呼

十里橋係三洞一小石橋耳又十里至卧龍場塘有鋪戶又十里至新市鋪又十里至大塘堡塘有鋪戶係蒲江縣界中在公館尖站共行程四十里

自大塘堡西行五里至鷄公碕塘十里至乾溪鋪有鋪戶又五里至名山縣交界牌又三里至吊枋鋪塘有吊枋池按古老傳云從前別處有房屋一所飛至

峩山由此處經過忽吊下一枋插在池內故名係大
道經過目覩其池在吊枋鋪西二里許長方大土水
坑今時形局尚存峩山上有飛來殿少一枋由吊枋
鋪二里至黑竹關有鋪戶又五里至鱔魚橋塘復行
六里下小坡名曰萬工坡因明洪武年間往雲南運
糧道路不通益州牧藍玉鑿石開道計費工萬餘故
名萬工坡又三里至何家坪下走一里石子路坡由
水田中石子路行名曰田壩過東河三洞南北大石
橋橋下即百丈水也元和志百丈縣有大池河經縣
東去五十步名勝志在縣東北六十里即置驛處源
出蓮花山經東與邛水合流至新津縣入白馬河又
名千尺潭近南五里銅鼓山為漢唐戍守之地舊志
流經廢百丈縣東下流入蒲江縣界為鐵溪河一名
千尺潭以水源遠而深也過橋上坡至白站塘公館
宿站共行程四十里考白站古百丈驛唐立百丈縣
故址再考百丈之說在白東^北方三里許有一穴過

圍百丈其深無比因此為名今訛呼之為白站塘設有外委一員兵丁駐守此間又有百丈泉時時泉水湧流

初四日自白站塘公館西行過小石橋上碎石墁坡南行平石板路九里下小坡過小橋復上小坡一里向西轉行以上由公館十里至洗馬池塘其池在路南庄民院牆外西南角葫蘆形嘴向西北因漢武侯屯兵在池內洗馬土人以此為名又一里至桅杆坪

有村落又二里至新店子有鋪戶又二里至古城鋪有古城橋石碣過橋有廟曰古城廟係東嶽天齊廟甚是整齊莊嚴房屋頗多潔淨又十里至白土坎塘有鋪戶又十里至女兒坵係路旁左右大水田池昔時揀秧農夫曰池大一日未能揀完其旁二女曰待我與爾代揀一日果揀完眾人皆笑於是二女忽得抽疾而斃以此為名又三里至和尚腦又二里至仙洞子塘至名山縣城大橋橋下之水源出九曲山繞

蒙山東南流至名山縣環繞城外而南縈廻襟帶西
流四十里入平羌江過橋進東門公館尖站共行程
四十里考名山縣城池窄小彈丸一區即古嚴道地
址城東門外三里許山上有梓潼廟紫府飛霞洞門
前有石蟠龍一又有帝君親筆紫府飛霞洞碑記碑
文曰吾舊生越嶲間按越嶲為郡居天下之西南角
得坤之用在漢時戶僅十四萬其俗多營窟版屋而
息如上古穴居野處之世其地則多土礦巖穴接黎

之邛笮都雅之靈關道自唐大斥土宇包夷荒而郡
縣之民不堪命越嶲遂與中華壤斷土隔

真人幸啟偃兵息民執玉斧而劃棄大渡之外越嶲
遂淪嗚呼吾將安歸當以黎雅為鄉也黎之邛峽關
有靈應洞乃吾之變化所惟古蒙舊屬漢嘉之青衣
其俗醇厚簡古如周民好善如堯民可封其地襟帶
巖巒如太華之磅礴岷峨之嶙峋吾嘗愛而居焉近
奉

帝命往來全蜀至則寓之以行化恨秦莽掩翳如小有青虛之所吾必久留邑下苟洙父子念此甚久吾知而直命之乃忻然於吾殿後斬荆棘去茅管為一洞天費僅二十萬錢屋穴皆備吾揭為紫府飛霞蓋本班固賦西都據坤靈之正位倣太紫之圓方與王勃記滕王閣彩徹雲衢霞霧齊飛之義上以示吾不忘故鄉之意下以期有志於攀鱗者休哉蒙陰之下亦有變化之所矣後之人有能自勵而期為汗漫游者乎然東山舊祠興自紹興丙寅逮今年丁卯始克有洞穴而洞穴不成於他人而成於苟洙父子亦有數也一日苟洙欲紀年月曰此事非神其誰宜為吾亦忻然親書於石開禧三年六月十八日其旁又有一碑碑記云嘗聞言以足志志以足言高作也不荒於放意不惑於取妍妙染也予觀

帝君親筆所紀紫府飛霞洞記落筆精妙王羲之十七帖飄逸近之而端勁不及命辭簡遠李令伯陳情表

深淳近之而雄蔚不及

君晉時人詞翰皆晉時風度外雖丹青可掬內實體骨不凡是天筆所臨萬象不能逃其形嗚呼豈塵凡可得而擬議者耶大明弘治十年四月二十六日提督四川學校按察司副使濟南王敕謹跋又西門外西北方十餘里有蒙山即禹貢旅平之所蒙山頂上受全陽氣長有茶樹數株在大石窟中生出乃進貢之物茶樹千年有餘今四圍立紅木欄設兵看守茶

譜有云山有五嶺頂有茶樹中頂曰上清峯即此蒙山之頂也又頂上甘露井其水異香甘美乃明建文君至蒙山出家求出之泉名甘露井

自名山縣城出西門西南行五里至火燒橋乃青石九塊搭砌三洞橋過橋即上小坡又三里至鷄鳴橋係名山雅安兩縣交界處又四里至金鷄關又名鷄棟關建有關帝廟昔人有詩云何年金鷄過留名在此間數聲笳屋裡驚起孤客眠由關下坡經過芋子

頭地方走水田中路視地勢水田反高其路低窪十
五里至桐梓林塘昔漢將桓侯張鎮守於此有人烟
舖戶又七里至龍溪橋大木浮橋長四十餘丈寬二
丈許橋下石柱墩七大涵洞橋之上有長廊與橋同
橋下之水青衣江水源出天全州西北徼外董卜土
司之地南過金鷄峽受九子山水又南過魚喜鄉為
魚河喜又南過靈關及蘆山縣至雅州為青衣水東亦
入汶江考雅州係古青衣國地故水因名過橋又三
里至平羌江渡口水源出六番地由天全州所屬之
木坪土司界流來受長濱江青衣江水東北流為平
羌江今俗呼為官渡者昔漢武侯平羌於此故以為
名至此以大錨覽四條為網繩在兩岸上釘大椿拴
固其上用粗茅竹縛網橫排三四層用粗大麻繩繫
於大網繩上縛固欄河其上鋪蓋板片復以繩結妥
為軟浮橋每年十月修浮橋次年三月中旬折毀乘
船渡過河登岸半里許至雅州府雅安縣大石橋橋

下水名長瀆江源出雅安縣南四十里飛龍關接榮
經界水北流至雅州東門外大石橋下北流入雅河
為平羌江過橋進東門公館宿站共行程四十里考
雅州府古之靖遠府城池窄狹人烟輳集市井繁華
漢嚴道地土產雅連雅茶絲烟綢緞布疋均價廉物
高營制係阜和協所屬黎雅營官兵查平羌河於每
年五六月間水漲以舟渡如水勢太過洶湧稍停住
兩日俟水消平然後再渡

雅州府至打箭鑪城五百五十三里

初五日自雅州府雅安縣城內上石堦大坡路出南
門行一里半路旁有武侯祠昔人題詩曰丞相祠堂
著雅州斗山威望古今留先年老鼠腥膻去今日衣
冠輻輳遊相嶺英風嘶戰馬瀘橋鐵索障狂流平羌
渡口銘勲后千載南人戰異謀由底塘又行三里上

嚴道山

原名鹿角山
唐元宗改名

又二里至涼水井又五里至五

里坡塘又二里至對崖有舖戶又三里至宋家坪有

鋪戶下坡走一段窄險偏坡過此寬石子路兩旁水
田又五里至風木埕塘有鋪戶又五里至四十里庄
有鋪戶又一里至大溪橋上坡有鋪戶復下坡仍復
上坡行四里至八步石塘有鋪戶由此崎嶇行五里
上坡下坡三次至八角灣有公館尖站共行程三十
五里自此皆在山谿之中石山崎嶇路徑之中而行
自八角灣行五里至觀音鋪塘有鋪戶由東山脚下
上山走三拐坡十里至飛龍關山頂有興龍寺又有
鋪戶店房山頂飛龍關塘上山路寬皆緩坡下山路
窄而陡路過剪茶坪下山至山脚下麻柳灣係榮經
縣交界有鋪戶過高橋關大石橋橋下之右山石上
有如一月之光明昔人云高橋明月乃榮經縣之一
景橋上有長廊走山邊路十五里至斜麻灣塘又三
里至十家橋又二里至新田棧又五里至孟山塘又
三里至尹夫子大廟五里至七縱河岸渡口查此河
源發瓦屋山武侯初擒孟獲處乘舟過渡登岸行二

里過浮橋至底塘又一里過榮經縣東關外長廊浮
橋進東門公館宿站共行程五十里此縣亦係漢嚴
道地又古孟州二水峽峙上水船勢城池最小市井
繁華人烟輳集昔武侯初擒孟獲之所後巡撫能泰
戡定勒碑於城外西有孟獲橋乃大道經過并西門
外有過街樓左山上有東嶽廟係宋朝四川節度使
李秘籌邊樓今改東嶽廟西門外上土坡名古城昔
孟獲所居之土城一座被武侯掘地穴穿入城中所
掘之洞今竟成一塘塘內起霧下雨今當路立有碑
坊曰古城烟雨四字此乃縣中之又一景

初六日自榮經縣出西門沿澗岸行十里至磨刀溪
塘有鋪戶又十里至箐口站塘亦有鋪戶順澗岸行
過五洞大通橋橋下水發源邛崃山周公山榮經水
也山路尤窄難行過橋有鋪戶橋下澗水澎湃大有
聲又十里路過鹿角壩水池鋪過一洞橋至安樂壩
塘仍沿澗岸行靠內則水田靠外則深澗又五里至

榮經清溪兩縣交界處有大公館宿站共行程三十
五里自榮經縣至此上大坡下大坡共十一次崎嶇
灣轉一路高山深澗水聲如雷轟震耳

初七日自清溪縣交界處出公館行三里許過三洞
大安橋從此沿澗岸上山又過長廊周公橋有兩段
窄路以上由界牌十里至小關山下坡順左邊岸經
過懸山倒掛處由懸石上向下滴水其路窄陡又走
澗水從大石塊下激流即在亂石中行一段又過長

壽大澗橋上坡九折陡直以上十五里至大關山諺
云清風雅雨即此地也自小關山行晴明乾爽天氣
少陰霧瀰漫細雨霏霏之日多余自小關山上至大
關山入相嶺路憶夏秋竹荆順路叢生深密一路兩
旁高山自然不見天日余春間經過竹荆刈刻又遇
天氣晴明日光閃耀亦如常時惟澗中水聲有潺緩
者有澎湃者更有雷鳴大作者其聲不同此大關山
古名九折坂昔王陽畏途之所張獻忠叛兵扎雅城

欲犯西南一帶時有漢源街民李華亭年七十有餘
率領鄉勇兵連敗獻忠七戰於九折坂上下設有據
守始呼為大小關山其山雖不高路稍陡直曲折而
上過山下坡係修墁坡石路過澗橋行五里至板房
有舖戶又過大澗橋登上半坡子路陡復過澗橋二
道路窄險滑二段又上窄滑坡一段由板房十里至
長老坪塘建有關帝廟武侯祠尖站共行程四十里
自長老坪至相嶺頂五里路轉峯迴轉角處窄險五
段又有三大灣山崖路若遇冰雪泥滑難行由相嶺
頂下山名象鼻子曲折而走又名二十四盤活沙太
多宜乎緩行查此嶺昔武侯屯兵之所即古之邛崃
山其山石子路冬春雪凌浩大險滑難行曲折盤旋
高聳非常摩天礙日直冲霄漢昔果親王過此題曰
奉旨撫西戎嚴冬登相嶺古今不朽名千載如斯永
考此嶺盤路係明洪武年間景川侯曹震修鑿以通
行人下走十五里至盤脚店有舖戶再五里至羊圈門